

CARNAVAL DI MUCHA NA SAN NICOLAS CHIQUITO PERO BUNITA

Cu hopi animacion musical

ORANJESTAD(AAN)—E carnaval di mucha na San Nicolas e aña aki tabata chiquito, manera a ser spera tambe, pero e animacion musical tabata grandi, y e gruponan cu a presenta, mayoria, school tabata bunita, pa no bisa luhoso ya cu e luho no tabata tey e aña aki, pero masha agradabel e parada tabata sinembargo pa mira.

Dilanti tabata tin manera custumber e prins y panchonan y e aña aki cu 33 reina, runnerup y candidatanan.

Despues a sigui e Reina di Carnaval Infantil, Mirla Elizabeth Passhier ariba su carosa.

E prome grupo cu a presenta tabata di Maureen Kusmus cu su muchanan di Donald Duck di Fiesta den cual tabata tin mas o menos 70 participante. Tambe nan tabata tin nan carosa cu Reina di Carnaval di San Nicolaas.

Savaneta Brassband cu a sigui tabata dilanti di e grupo number 2 "Kabou-

ternan di Arubanita Kleuterschool cu 100 mucha y nan carosa di paddestoel. Mes ora a sigui e brassband cu e aña aki ta ser elogia tur caminda, Kids of Fame y e 25 participantenan di Road on Fire, bomeronan etc.

Rayo di Solo tabata di cuatro grupo cu 200 mucha disfrazado como solo y un carosa masha bunita cu emblema di e school.

Otro dos brassband cu tabata tin tabata Moon-dogs y Hells Angels y nan tras tabata tin e grupo di Richi's Sexy Dancers ariba carosa como grupo 5, mientras cu e ultimo grupo tabata di e Brazilian Samba Fantasy cu 70 mucha.

Musical TIME, Steelband na pia y Vibracion 74 a sera e parada cu tabata masha anima, especialmente den caya grandi di San Nicolas y Lago weg, unda e publico a participa realmente cu e muchanan.

Duracion di e parada pa sitio tabata maximo mei ora e aña aki.

